

§. VII. Per τὰς ἐκπερίτομους, eos, qui sunt ex circumcissione, intelligit hoc loco Apostolus non tam Judæos circumcisos simpliciter (uti phrasis hæc Act. X. 45. & XI. 2, Rom. IV. 12. Coloss. IV. 11. accipitur, in oppositione ad ἀκροβυστιαν ἔχοντας, præputium habentes, sive præputiatos Act. XI. 3. Genes. XXXIV. 14.) quam Judæos tales, qui usum circumcissionis, cæterarumque ceremoniarum Mosaicarum in Ecclesia Christiana retinendum esse censebant, & Christum Mosis, seu Evangelium Legi jungere studebant, quomodo hæc loqvendi formula Tit. I. 10. quoque usurpatur. Factum ergo Petri, ob quod a Paulo reprehenditur hoc est; Cum Antiochiam venisset, juxta tenorem Concilii Hierosolymis habiti, una cum Gentibus ad Christianismum conversis sumebat cibum, non servato discrimine escarum Lege Mosis olim in populo Judaico Levit. II. prohibitarum, sed cum supervenissent Judæi, ζηλωταὶ τῆ νόμου Act. XXI. 20. ex metu horum fidelium ex Judaismo converforum, subducebat se, factus ex *Apostolo hypostolus*, ac seorsim ivit, declinata Gentilium converforum *συνπολημία*, ut loqvitur B. Dannhavverus in tract. de Mystero Syncretismi pag. 74. Non ergo ob id Paulus Petrum arguit, quod gentiliter vixisset, h. e. una cum Gentibus conversis omni cibo indiscriminatim libere usus esset, sed ob subductionem, separationem & incautam Judaismi simulationem, atque scandalum publicum, quod dabat gentibus, quas suo exemplo cogebat judaizare, ut ex sequentibus patebit. Permovebat autem Petrum ad hanc periculosam & scandalosam simulationem præsentia discipulorum Jacobi Apostoli, qui quidem fidem in Christum erant professi, nondum tamen plane Mosen dedocti, adeo enim insederat illorum animis opinio, de servandis ritibus Mosaicis, ut ægre ferrent, eos alibi negligi, & vivere pergebant Ἰσραηλιτικῶς, ideo metu offendendi illos, Petrus in simulationem illam abripitur.

§. VIII. In vers. 13. in primis consideranda est vox ὑπόκρισις. Significat autem ὑποκρίνεσθαι in genere *simulare*, *ingere*, diciturque de illis, qui aliud faciunt, aliud statuunt, sive qui aliud præ se ferunt, aliud in animo sentiunt. Inde hypocrisis in genere est, cum quis verbis, gestibus & factis externis aliud se esse simulat, quam revera est.